

~~T5213~~ / 0441b
T5214.4 /

6

6

CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE

MAR 14 1932

唐詩紀事卷第十五

王灣

奉使登終南山詩云常愛南山遊因而盡原隰數
朝至林嶺百仞登嵬岌石壯馬徑窮苔色步緣
入物奇春狀改氣遠天香集虛洞策杖鳴低雲
拂衣溼倚巖見廬舍入戶欣拜揖問性矜勤勞
示心教澄習玉英時共飲芝草爲余拾境絕人
不行潭深鳥空立一乘從此受九轉兼是給辭

哈佛大學
哈佛燕京
圖書館
珍藏印

處若輕飛憇來唯吐吸閒襟超已勝迴路倏而
及煙色松上深水流山下急漸平逢車騎向晚
睨城邑峰在野趣繁塵飄宦情緝辛苦久爲吏
勞生何妄執日暮懷此山悠然賦斯什

閏月七日織女云耿耿曙河微神僊此會稀今年
七月閏應得兩迴歸

灣登先天進士第開元初爲滎陽主簿馬懷素欲
校正羣籍灣在選中各部撰次後爲洛陽尉商

璠云灣詞翰早著爲天下所稱最者不過一二
遊吳中江南意云海日生殘夜江春入舊年詩
人以來無聞此句張燕公居相府手題於政事
堂每示能文令爲楷式又搗衣篇云月華照杵
空悲妾風響傳砧不見君所有衆製類咸若斯
非張蔡之未見也覺顏謝之彌遠乎

江南意云南國多新意東行伺早天潮平兩岸失
風正一帆懸海日生殘夜江春入舊年從來觀

氣象惟向此中偏

一作次北固山下云客路青山外行舟綠水前潮平兩岸

潤風正一帆懸海日生殘夜江春入舊年鄉書何處達歸雁洛陽邊

麗正殿賜宴同用天前煙年四韻應制云金殿忝

陪賢瓊羞忽降天鼎羅仙掖裏觴拜鎖闈前院

逼青霄路厨和紫禁煙酒酣空抃舞何以答昌

年

秋夜寓直卽事懷贈蕭令公裴侍郎兼通簡南省

諸友人云聖主萬年興賢臣數載升古靈傳岳

秀宏量稟川澄畿甸舉長策風霜秉直繩出車

遙俗震登閣滿朝稱賦簡流亡輯農安政理憑

還家新長幼巡隴舊溝塍忠梗大勲立衰羸墮

業懲焚香兼御史懸鏡委中丞旃隼當朝立臺

驄登郡乘司徒漢家重國典潁川微雲路俄平

入台階忽上陵秉鈞調造化宣綽慰黎蒸金省

方秋作瑤軒直夜凭中書贈陳準右相簡王陵

三傑賢更穆百僚歡且兢搖懷及賓友計里辨

淄澠閭闔暝陰散勾陳爽氣凝月深宮樹轉河
近禁樓冰甲吏夙駟策微涓効斗升望麾宵繼
火書板曙懷蒸彼此雖流盼規模轉伏膺惠將
霄漢隔勞或歲時矜位重恩寧濫才輕懾不勝
林巒甘獨往疵賤苦相仍敢忘銜花雀思同附
驥蠅平生逐鳥雀何日似蒼鷹

晚春詣蘇州贈武員外云蘇臺憶季常飛棹歷江
鄉恃此功曹椽初離華省郎貴門生禮樂明代

秉文章嘉璧位先進鴻儒名重揚爰從姻戚貶
豈失忠信防萬里行驥足十年睽鳳翔迴遷翊
元聖入拜佇惟良別業對南浦羣書滿北堂意
深投轄盛才重接筵光陋學叨鈇簡弱齡詞翰
場神馳勞舊國顏展別殊方際曉雜紛散殘春
衆物芳煙和疎樹滿雨續小溪長旅拙感成慰
通賢顧不忘從來琴曲罷開匣爲君王

晚夏馬升卿池亭卽事寄京中二三知己云忝職

畿甸淹濫陪時英後才輕策疲劣勢薄常駈走
牽役勞風塵秉心在巖藪崇賢開別業形勝代
希偶竹繞清渭涓泉流白渠口逡巡期賞會揮
忽變星斗逮此乘豫餘因而訪幽叟入來殊景
物行復洗紛垢林淨秋色多潭深月光厚盛香
蓮近拆新味瓜初剖滯拙懷隱淪書之寄良友
奉同賀監林月清酌云華月當秋滿朝英假興同
淨林新霽入窺院早涼通碎影行筵裏搖花落
酒中清宵凝爽意併此助文雄

觀搗箏云虛室有秦箏箏新月復清絃多弄委曲

柱促語分明曉怨凝繁手春嬌入慢聲近來惟

此樂傳得美人情

一作祖詠

魏知古

知古深州人相睿宗薦洹水令呂太一蒲州司功
叅軍齊澣內率騎曹叅軍柳澤密尉宋遙左補
闕袁暉右補闕封希顏伊闕尉陳希烈後皆爲

聞人

玄元觀尋李先生不遇詩云羽客今何在空尋伊
洛間忽聞歸苦縣應想入函關未作千年別猶
應七日還神仙不可見寂寞返蓬山

奉和春日途中喜雨應詔詩曰豫遊欣勝地皇澤
乃先天油雲陰御道膏雨潤公田隴麥霑逾翠

山花溼更燃稼穡良所重方復悅豐年

此詩見虞世南

集中攷魏知古此題詩云皇輿向洛城時雨應
天行麗日登巖送陰雲出野迎濯枝林杏發潤

葉渚蒲生絲入綸言喜花依錦字明微臣
忝東觀載筆佇西成與此絕不同詳之

春夜寓直鳳閣懷羣公詩云拜門傳漏晚寓省索
居時昔重安仁賦今稱伯玉詩鴛池滿不溢鷄
樹久逾滋夙夜懷山甫清風詠所思

先天初為侍中從獵渭川獻詩曰嘗聞夏太康五
弟訓禽荒我後來東狩三驅盛禮張順時鷹隼
擊講事武功揚奔走未及去翺飛豈暇翔非熊
從渭水瑞翟想陳倉此欲誠難縱茲遊不可常

子雲陳羽獵僖伯諫漁棠得失鑒齊楚仁恩念
禹湯雍熙諒在宥亭毒匪多傷辛甲今爲史虞
箴遂孔彰手詔褒之
知古卒宋璟歎曰叔向古遺直子產古遺愛兼之
者其魏公乎

許景先

常州人先獻賦李迥秀見之歎曰是宜付太史後
與齊澣王丘韓休更知制誥張說曰許舍人之
文雖乏峻峰激流然詞旨豐美得中和之氣天
寶間以吏侍卒

陽春怨云紅樹曉鶯啼春風暖翠閨雕籠薰繡被
珠履踏金堤芍藥花初吐菖蒲葉正齊藁砧當
此日行役向遼西

送張說巡朔方應制云文武承邦式風雲感國禎
王師親賦政廟略久論兵漢主知三傑周官統
六卿四方分閩受千里坐謀成介冑辭前殿壺

唐詩集卷之七
觴宿左營賞延頒貺重宸賜出車榮龍武三軍
氣魚鈴五校名郊雲駐旌羽邊吹引金鉦振旅
方稱德安人更克貞佇觀銘石罷同聽凱歌聲

姚崇

龍池興慶宮池也明皇潛龍之地張九齡撰龍池
頌刊石興慶宮玄宗以爲不稱更命嗣澤王璆
爲頌建花萼樓北初睿宗五子賜第隆慶坊號
五王宅明皇爲太子製大衾長枕將與諸王共
之睿宗喜甚明皇先天後盡以隆慶舊邸爲興
慶宮而賜薛憲第於勝業申岐第於安興環列
宮側天子於宮西南置樓西曰花萼相輝南曰
勤政務本

享龍池樂章云恭聞帝里生靈祉應報明君鼎業
新旣叶翠泉光寶命還符白水出真人當時舜
海潛龍躍此日堯河帶馬巡獨有前池一小雁
叨承舊惠入天津又云帝宅王家大道邊神馬

唐詩集卷之八
八
潛龍涌聖泉昔日昔時經此地看來看去漸成
川歌臺舞榭宜正月柳岸梅洲勝往年莫疑沙
上春雲少祇爲龍飛直上天

張曲江有和姚令公哭李尚書詩姚亦時有述作
然少見於世

口箴云君子欲訥吉人寡辭利口作戒長舌爲詩
斯言不善千里違之勿謂可復駟馬難追惟靜
惟默澄神之極去甚去泰居物之外多言多失

多事多害聲繁則淫音希則大室本無暗垣亦
有耳何言者天成蹊者李似不能言爲世所尊
言不出口寇時之首無掉爾舌以速爾咎無易
爾言亦孔之醜欽之慎之可大可久欽之伊何
三命而走慎之伊何三緘其口勉哉夫子行矣
勉旃書之屋壁以代韋絃

李德裕舌箴序曰余宿於洞庭西夢與中書令姚
公偶坐如舊相識問余曰君見僕所作口箴乎

唐詩集卷九
九
余對曰去歲居守東周於公曾孫諫議邵處覩
金石之刻遂莞爾而笑曰孫子猶能藏之又曰
余感姚公之夢乃爲舌箴云

姜皎

享龍池樂章云龍池初此出龍山常經此地謁龍
顏日日芙蓉生夏水年年楊柳變春灣堯壇寶
匣餘煙霧舜海漁舟尚往還願以飄飄五色影
從來從去九天間又云龍興白水漢興符聖主
時乘運斗樞岸上丰茸五花樹波中的皦千金
珠操環昔聞迎夏啓發匣先來瑞有虞風色雲
光隨隱見赤雲神化象江湖

皎長安中爲尚衣奉御明皇在藩邸識其有非常
度委心焉及卽位授殿中少監出入卧内開元
十年爲秘書監坐洩禁中語流欽州道死

姜晞

龍池樂章云靈沼縈迴邸第前浴日涵春寫曙天

始見龍臺昇鳳闕應如霄漢起神泉石匱渚傍
還啓聖桃李初生更有僊欲化帝圖從此受正
同河變一千年又云乾坤啓聖吐龍泉泉水年
年勝一年始看魚躍方成海卽覩龍飛利在天
洲渚遙將銀漢接樓臺直與紫微連休氣雲光
常不散懸知此地是神僊

登永隆二年進士第

王岳靈

聞漏詩云建禮含香處重城待漏晨徐聞傳鳳詔
曉唱辨雞人銀箭殘將盡銅壺漏更新催簫當
午夜移刻及三辰杳杳從天遠泠泠出禁頻直
宜殘漏曙肅肅對鉤陳

登開元進士第天寶十年爲監察御史撰張惡子
廟碑

楊顏

田家云小園足生事尋勝日傾壺蒔蔬利於鬻纔

青圓已無四隣同野竹日夕共樵枯田家心適
時春色遍桑榆

登開元進士第

鄭繇

失白鷹詩云白錦文章亂丹霄羽翮齊雲中呼暫
下雪裏放還迷梁苑驚池鷺陳倉拂野鷄不知
寥廓外何處獨飛棲

開元初經慈澗題詩云岸與恩同廣波將慈共深
涓涓勞日夜長似下流心

繇鄭州人登嗣聖元年進士第開元時岐王範愛
儒士繇與劉廷琦閻朝隱張諤皆遊其門飲酒
賦詩相娛樂子審有詩名終於袁州刺史與杜
子美善

張諤

九日詩云秋天林下不知春一種佳遊事也均絳
草從朝飛着夜黃花開日未成旬將橫栢樹頻

驚馬半醉歸途數問人城遠登高併九日茱萸
凡作幾年新

登景龍進士第岐王範好儒士與閻朝隱劉廷琦
鄭繇等飲酒賦詩駙馬都尉裴虛已善識緯坐
私與範遊徙嶺南廷琦貶雅州司戶諤山荏丞
然明皇於範無間也

趙仁獎

令乘驄馬去丞脫繡衣來仁獎送上蔡令潘好禮

拜御史詩也或訝其假手蓋仁獎住王戎墓側
善歌黃麈景龍中負薪詣闕云助國調鼎卽除
臺官中書令姚崇曰此是黃麈耶授以當州一
尉惟以黃麈自銜宋務光嘲之曰趙仁獎出王
戎墓下入朱博臺中舍彼負薪登茲列柏行人
不避驄馬坐客惟聽黃麈忽一夫負兩束薪曰
此合拜殿中人問其由曰趙以一束拜監察此
兩束合授殿中

張翬

或作暈

遊棲霞寺云躋險入幽深翠微含竹殿泉聲無休
歇山色時隱見潮來雜風雨梅落成霜霰一從
方外遊頓覺塵心變

潤州延陵有包融儲光羲曲阿有丁仙芝緱氏主
簿蔡隱丘監察御史蔡希周渭南尉秦希寂處
士張彥雄張朝校書郎張翬吏部常選周瑀長
洲尉談戡句容有殷遙硤石主簿樊光橫陽主

簿沈如筠江寧有右拾遺孫處立徐延壽丹徒
有江都主簿馬佺武進尉申堂構十八人皆有
詩名殷璠次爲丹陽集翬開元進士蕭穎士同
年生也蕭穎士有張翬下第歸江東詩云俱飛
仍失路綵服邇清波地積東南美朝遺甲乙科
客愁千里別春色五湖多明日舊山去其如相
望何

金昌緒

春怨詩云打却黃鸝兒莫教枝上啼幾迴驚妾夢

不得到遼西

顏陶取此詩為唐類詩。一作蓋嘉運伊州歌者非也。然此詩為嘉

運所進編入樂府後乃誤為嘉運作耳

昌緒餘杭人

蘇晉

晉中宗戶部尚書珣之子數歲知為文吏侍房穎

叔秘書少監王紹宗曰後來之王粲也先天中

為中書舍人杜暹當國表宋璟為吏書晉齊潮

為侍郎世謂臺選

過賈六詩云主人病且閑客來情彌適一酌復一

笑不知日將夕昨來屬歡遊於今盡成昔努力

持所趣空名定何益

丞相少傅拜職天子作三傑之詩以宴命晉序云

惟聖寶賢以齊皇極有若左丞相燕國公右丞

相廣平公太子少傅安陽侯皆生人碩德皇國

元老道著廊廟績宣華戎由是懋其成功錫以

元圭咨日于朔擇時于秋俾對命王庭受職公
府見羣屬揖庶僚禮官辨章掌舍陳次瞽工備
樂侑饗獻蒸六卿拜下以成儀三事自天而來
賀秩秩賓序暉暉旅醞玉緯垂文南風和雅頌
之變金漿降醴雲天光飫酌之宜宰德貴和盡
莊敬具瞻之範羣情尚洽預周旋宴語之歡方
將一心天工戮力帝載寢黑山之柝包青海之
戈雲雨賢才水火菽粟日詠魚藻歲陳由庚願
殷趙之年畱魯陽之景爰命在宴乃賡載歌時
左相張說右相宋璟太子少傅源乾曜同日上
官命宴於東堂明皇賜詩曰赤帝收三傑黃軒
舉二臣故序及之

送張說巡邊應制云方漢比周年興王合在宣
亟聞降虜拜復覩出師篇圻父萬邦式英猷三
略傳算車申夏政菱舍啓戎田嚴問盟胡苑軍
容濟洛川皇情悵關旆詔餞列郊筵路接禁園
草

池分玉井蓮離聲軫去角居念斷歸蟬三捷豈
云爾七擒良信然具寮誠寄望奏凱秋風前

張九齡

在郡秋懷二首秋風入前林蕭瑟鳴高枝寂寞遊
子思寤歎何人知宦成名不立志存歲已馳五
十而無聞古人深所疵平生去外飾直道如不
羈未得操割効忽復寒暑移物情有同然身退
毀亦隨悠悠滄江渚望望白雲涯露下霜且降

澤中草離披蘭艾若不分安用馨香爲又云庭
蕪生白露歲候感遐心策蹇慙遠塗巢枝思故
林小人恐致寇終日如臨深魚鳥好自逸池籠
安所欽挂冠東都門採蕨南山岑議道誠愧昔
覽分還愜今憮然憂成老空爾白頭吟
感遇云蘭葉春葳蕤桂華秋皎潔欣欣此生意自

爾爲佳節誰知林棲者聞風坐相悅草木有本
心何求美人折

段成式云桂花三月生黃而不
白曲江云桂花秋皎潔妄矣

其幽林歸獨臥滯慮洗孤清持此謝高鳥因之

傳遠情日夕懷空意人誰感至精飛沉理自隔

何所慰吾誠

其二

魚游樂深池鳥棲欲高枝嗟爾

蜉蝣羽薨薨亦何為有生豈不化所在奚若斯

神理日微滅吾心安得知浩歎揚朱子徒然泣

路岐

其三

孤鴻海上來池潢不敢顧側見雙飛鳥

巢在三株樹矯矯珍木顛得無金丸懼美服患

人指高明逼神惡今我遊冥冥弋者何所慕

其四

吳越數千里夢寐今夕見形骸非我親衾枕卽

鄉縣化蝶猶不識川魚安可羨海上有仙山歸

期覽神變

其五

抱影吟中夜誰聞此歎息美人適

異方庭樹含幽色白雲愁不見滄海飛無翼鳳

凰一朝來竹花此可食

其六

漢上有遊女求思安

可得袖中一書札欲寄雙飛翼冥冥獨不見耿

耿徒緘憶紫蘭秀空蹊皓露奪幽色馨香歲欲

晚感歎情何極白雲在南山日暮長太息

其七

九齡在相位有謗匪躬之誠明皇既在位久稍
怠庶政每見帝極言得失林甫時方同列陰欲
中之將加朔方節度使牛仙客實封九齡稱其
不可甚不叶帝旨他日林甫請見屢陳九齡頗
懷誹謗于時方秋帝命高力士持白羽扇以賜
將寄意焉九齡惶恐因作賦以獻又爲鷺詩以
貽林甫曰海鷺何微眇乘春亦蹇來豈知泥濘
賤只見玉堂開繡戶時雙入華軒日幾回無心

與物競鷹隼莫疑猜林甫覽之知其必退恚怒
稍解

九齡洎裴耀卿罷免之日自中書至月華門將就
班列二人鞠躬卑遜林甫處其中揚揚自得觀
者竊謂一鷗挾兩兔俄而詔張裴爲左右僕射
罷知政事林甫視其詔大怒曰猶爲左右丞耶
二人趨就本班林甫目送之公卿不覺股慄
子美八哀詩曰相國生南紀金璞無留礦仙鶴下

人間獨立霜毛整矯然江海思復與雲路永寂
冥想土階未惶等箕穎上君白玉堂倚君金華

省

九齡登進士第應拔萃登乙科拜校書郎玄宗在東宮舉天下文章之士親加策問九齡

策高

等 碣石歲崢嶸天地日蛙黽退食吟大庭何

心託榛梗骨驚畏曩哲鬢變負人境雖蒙換蟬

寇右地慙多幸

侍中寇加貂蟬九齡為相以文雅為上知右相李林甫惡之引

牛仙客以傾之遂罷

敢忘二疏歸痛迫蘇耽井紫綬映暮

年荊州謝所領

初九齡為相薦長安尉周安周子諒為監察御史至是子諒以

妄陳休咎上親加詰問令於朝堂決殺之九齡坐引非其人左遷荊州大都督府長史者久之

庾公興不淺黃霸鎮每靜賓客引調同諷詠在

務屏詩罷地有餘篇終語清省一陽發陰管淑

氣含公鼎乃知君子心用才文章境

九齡善屬文有集二

十卷散秩起翠螭倚薄巫廬並綺麗玄暉擁牋誅

任昉騁自成一家則未缺隻字警千秋滄海南

名繫朱鳥影歸老守故林戀闕悄延頸波濤良

史筆蕪絕大庾嶺向時禮數隔制作難上請再

讀徐孺碑猶思理煙艇

九齡字子壽曲江人輔明皇爲賢宰相旣卒明皇每用人必曰風度能若九齡乎張說論其文曰如輕縑素練實濟時用微窘邊幅

柳子厚敘楊評事文集云文有二道辭令褒貶本乎著述者也道揚諷諭本乎比興者也著述者流蓋出於書之謨訓易之象系春秋之筆削其要在於高壯廣厚詞正而理備謂其藏於簡冊

也比興者流蓋出乎虞夏之詠歌殷周之風雅其要在乎麗則清越言暢而意美謂宜流於謠誦也唐興以來稱是選而不作者梓潼陳拾遺其後燕文貞以著述之餘攻比興而莫能極張曲江以比興之隙窮著作而不克備其餘各探一隅相與背馳於道者其去彌遠文之難兼斯亦甚矣

中書舍人姚子顏狀其行曰公所得俸祿悉歸鄉

園先得賜物上表進納其清約如此常賦詩曰
清節往來苦壯容離別衰有以見公之情也公
以風雅之道與寄爲主一句一詠莫非與寄時
皆諷誦焉

明皇送張說巡朔方賜詩云命將綏邊服雄圖出
廟堂說應制詩有從來思博望許國不謀身之
句張嘉正云山川看是陣草木想爲兵盧從愿
云佇聞歌杖杜凱入繫名王徐知仁云由來詞

翰首今見勒燕然皆取制勝之義獨九齡詩云
宗臣事有征廟算在休兵天與三台座人當萬
里城朔南方偃革河右誓揚旌又曰威風六郡
勇計日五戎平山甫歸應疾留侯功復成大抵
取旋師偃武之義宋璟詩云以智泉寧竭其徐
海自清亦有深意也

釋皎然讀曲江集詩云相公乃天啓人文佐生成
立程正顏靡繹思何縱橫春杼弄緗綺陽林敷

玉英飄然飛動姿邈矣高簡情後輩驚失步前
修敢爭衡始欣耳目遠再使幾慮清體正力已
全理精識何妙昔年歌陽春徒推郢中調今朝
聽鸞鳳豈獨蘇門嘯帝命鎮雄州詩流據上游
才兼荆衡秀氣助瀟湘秋逸蕩子山匹怪奇文
暢儔沈吟未終卷變態紛難數耀耳代明璫襲
衣比芳杜悒悒聞玉聲寤寤在靈府

崔國輔

少年行云遺却珊瑚鞭白馬驕不行章臺折楊柳
春日路傍情

魏宮詞云朝日點紅粧擬上銅雀臺画眉猶未竟
魏帝使人催

長信宮云長信宮中草年年愁處生時侵珠履迹
不使玉階行

河岳英靈集
題作長信草

怨詞云妾有羅衣裳秦王在時作爲舞春風多秋
來不堪著

中流曲云歸來日尚早却欲向芳洲渡口水流急
回舟不自由

子美獻三賦國輔于休烈每稱述焉子美有留贈
集賢院崔于二學士詩云欲整還鄉旆長懷禁
掖垣謬稱三賦在難述二公恩太白有送崔度
自幽燕還吳詩云故人禮部員外國輔之子也
輔明皇時應縣令舉授許昌令集賢直學士禮
部員外坐王鉷近親貶晉陵郡司馬

商璠云國輔詩婉變清楚深宜諷味樂府數章雖
絕句然古人不能過也

雜詩云逢著平樂兒論交鞍馬前興酣一斗酒恰
用十千錢後余在關內作事多迤邐何處肯相
救徒聞寶劍篇

古意云淨掃黃金階飛霜厚如雪下簾彈箜篌不

忍見秋月

集與紀
俱不載

湖南云湖南送君去湖北送君歸湖裏鴛鴦鳥雙

雙他自飛

香風詞云洛陽梨花落如霰河陽桃葉生復齊坐

惜玉樓春欲盡紅綿粉絮裛粧啼

時刻作白苧詞

對酒吟云行行日將夕荒林古塚無人迹蒙籠荆

棘一鳥吟屢唱提壺沽酒喫古人不達酒不足

遺恨精靈傳此曲寄言世上諸少年平生且盡

杯中綠

唐詩紀事卷第十五

終

唐詩紀事卷第十六

王維

集異記載維未冠文章得名妙能琵琶春之一日

岐王引至公主第使為伶人進主前一進新曲

號鬱輪袍并出所為文主大奇之令宮婢傳教

遂召試官至第諭之作解頭登第

祿山之亂李龜年奔於江潭曾於湘中採訪使筵

上唱云紅豆生南國秋來發幾枝贈君多採擷

此物最相思又清風明月苦相思蕩子從戎十
載餘征人去日殷勤囑歸雁來時數附書此皆
維所製而梨園唱焉

維年十七時九日憶山東弟兄云獨在異鄉爲異
客每逢佳節倍思親遙知兄弟登高處遍插茱
萸少一人

祿山大會凝碧池梨園弟子歔歔泣下樂工雷海
清擲樂器西向大慟賊支解於試馬殿維時拘
於菩提寺有詩曰萬戶傷心生野烟百僚何日
更朝天秋槐葉落深宮裏凝碧池頭奏管絃後
有罪以此獲免

寧王憲貴盛寵妓數十人皆上色宅左有賣餅之
妻纖白明媚王一見屬意因厚遺其夫求之寵
愛逾等歲餘因問曰汝復憶餅師否使見之其
妻注視雙淚垂頰若不勝情時王座客十餘人
皆當時文士無不悽異王命賦詩維先成云莫

以今時寵難忘異日恩看花滿眼淚不共楚王
言座客無敢繼者王乃歸餅師以終其志

出本
事詩

河岳英靈集題云息夫人
怨樂府題曰簇拍相府蓮

或說維詠終南山詩譏時也詩曰太一近天都連
山接海隅言勢焰盤據朝野也白雲回望合青
靄入看無言徒有其表而無其內也分野中峰
變晴陰衆壑殊言恩澤偏也故人投處宿隔水
問樵夫言畏禍深也

維善畫破墨山水嘗自制曰當代謬詞客前身應
畫師不能捨餘習偶被時人知

維字摩詰為給事中遇祿山反賊平下遷太子中
允三遷尚書右丞喪妻不娶孤居三十年母亡
表輞川第為寺終葬其西寶應中代宗語王縉
曰朕嘗於諸王座聞維樂章今傳幾何遣中人
往取縉哀集數百篇上之表云臣兄文詞立身
行之餘力當官堅正秉操孤直縱居要劇不忘

清淨實見時輩許以高流至於晚年彌加進道
端坐虛室念茲無生乘興爲文未嘗廢業詔答
云卿之伯氏天下文宗位歷先朝名高希代抗
行周雅長揖楚辭調六氣於終篇正五音於逸
韻泉飛藻思雲散襟情詩家者流時論歸美誦
於人口久鬱文房謨以國風宜登樂府眎朝之
後乙夜將觀石室所藏歿而不朽栢梁之會今
也則亡乃眷棣華克成編錄聲猷蓋茂歎息良

深

商璠云維詩辭秀調雅意新理愜在泉爲珠著壁
成繪一字一句皆出常境至如落日山水好漾
舟信歸風又澗芳襲人衣山月映石壁又天寒
遠山靜日暮長河急又賤日豈殊衆貴來方悟
稀又日暮沙漠陲戰聲烟塵裏詎肯慙於古人
也

送晁監歸日本國云積水不可極安知滄海東九

州何處去萬里若乘空向國惟看日歸帆但信
風鰲身映天黑魚眼射波紅鄉樹扶桑外主人
孤島中別離方異域音信若為通

送丘為云憐君不得意況復柳條春為客黃金盡
還家白髮新五湖三畝宅萬里一歸人知禰不
能薦羞稱獻納臣

獵騎云風勁角弓鳴將軍獵渭城草枯鷹眼疾雪
盡馬蹄輕忽過新豐市還歸細柳營回看射鵬

處千里暮雲平

自送晁監以後三詩姚合極玄
集云此詩家射鵬之手也更揮

其極
玄者

藍田精舍云落日山水好漾舟信歸風翫奇不覺
遠因以尋源窮遙愛雲木秀初疑路不同安知
清流轉偶與前山通捨舟理輕策果然愜所適
老僧四五人逍遙蔭松栢朝梵林未曙夜禪山
更寂道心及牧童世事問樵客暝宿長林下焚
香卧瑤席澗芳襲人衣山月映石壁再尋畏迷

誤明發更登歷笑謝桃源人花紅復來覲

西施篇云艷色天下重西施寧久微朝仍越溪女

暮作吳宮妃賤日豈殊衆貴來方悟稀要人傳

脂粉不自著羅衣君寵益嬌態君憐無是非當

時浣紗伴莫得同車歸寄言隣家子效顰安可

希

淇上別趙仙舟云相逢方一笑相送還成泣祖席

忽傷離荒城復愁入天寒遠山靜日暮長河急

解纜君已遙望君猶佇立

李陵詠

時年十九

云漢家李將軍三代將門子結髮有

奇策少年成壯士長驅塞上兒深入單于壘旌

旗列相向簫鼓悲何已日暮沙漠陞戰聲烟塵

裏將令驕虜滅豈獨名王侍既失大軍援遂嬰

穹廬耻少小蒙漢恩何堪坐思此深衷欲有報

投軀未能死引領望子卿非君誰相理

渭城朝雨裊輕塵客舍青青柳色新勸君更盡一

孟酒西出陽關無故人維送客詩也

集題作送元二使安

西樂府題曰渭城曲

王縉

縉字夏卿河中人與兄維俱以名聞舉草澤文詞

清麗科上第相肅宗

縉九月九日作云莫將邊地比京都八月嚴霜草

已枯今日登高樽酒裏不知能有菊花無

別輞川云山月曉仍在林風涼不絕殷勤如有情

惆悵令人別

贈曇壁上人云林中空寂舍階下終南山高卧一

牀地回看六合間浮雲幾處滅飛鳥何時還問

義天人接無心世界閑誰知大隱客兄弟自追

攀

遊悟真寺云聞道黃金地仍成白玉田擲山移巨

石呪嶺出飛泉猛虎同三逕愁猿學四禪買香

燃綠桂乞火踏青蓮草色搖霞上松風泛月邊

山河窮百二世界滿三千梵宇聊憑覽王城遂
渺然灞陵纔出樹渭水欲連天遠縣分朱郭孤
村起白煙望雲思聖主披霧憶羣賢薄宦慙尸
祿終身尚擬玄誰言草菴客曾和栢梁篇

送孫秀才云帝城風日好況復建平家玉枕雙紋
簾金盤五色瓜山中沽魯酒松下飯胡麻莫厭

田家苦歸期遠復賒

已上二詩又見摩詰集

裴迪

過曇興上人山院云不遠灞陵邊安居向十年入
門穿竹徑留客聽山泉鳥嘯深林裏心閒落照
前浮名亦何益從此願棲禪

迪初與王維興宗俱居終南天寶後為蜀州刺史

與杜甫友善

興宗姓崔

迪與王維訪逸人不遇賦詩云恨不逢君出荷蓑
青松白屋更無他陶令五男曾不有蔣生三徑
任相過芙蓉曲沼春流滿薜荔成帷晚靄多聞

說桃源好迷客不如高臥眄庭柯維詩云桃源
一向絕風塵柳市南頭訪隱淪到門不敢題凡
鳥看竹何須問主人城外青山如屋裏東家流
水入西鄰閉戶著書多歲月種松皆老作龍鱗
王維輞川集云余別業在輞川山谷其遊止有孟
城坳華子岡文杏館斤竹嶺鹿柴木蘭柴茱萸
泝宮槐陌臨湖亭南坨歌湖柳浪樂家瀨金屑
泉白石灘北坨竹里館辛夷塢漆園椒園等與
裴迪閑暇各賦絕句云

孟城坳云新家孟城口古木餘衰柳來者復爲誰

空悲昔人有維結廬古城下時登古城上古城

非疇昔今人自來往迪

華子岡云飞鳥去不窮連山復秋色上下華子岡

惆悵情何極維落日松風起還家草露晞雲光

侵履跡山翠拂人衣迪

文杏館云文杏裁爲梁香茅結爲宇不知棟裏雲

去作人間雨維迢迢文杏館躋攀日已屢南嶺

與北湖前看復迴顧迪

斤竹嶺云檀欒映空曲青翠漾漣漪暗入商山路

樵人不可知維明流紆且直綠篠密復深一逕

通山路行歌望舊岑迪

鹿柴云空山不見人但聞人語響返景入深林復

照青苔上維日夕見寒山便為獨往客不知深

林事但有磨麿迹迪

木蘭柴云秋山斂餘照飛鳥逐前侶彩翠時分明

夕嵐無處所維蒼蒼落日時鳥聲亂溪水綠溪

路轉深幽興何時已迪

茱萸泚云結實紅且綠復如花更開山中儻留客

置此茱萸杯維飄香亂椒桂布葉間檀欒雲日

雖迴照森沉猶自寒迪

宮槐陌云仄逕蔭宮槐幽陰多綠苔應門但迎掃

畏有山僧來維門前宮槐陌是向歆湖道秋來

唐詩集
十
山雨多葉落無人掃迪

臨湖亭云輕舸迎上客悠悠湖上來當軒對樽酒

四面芙蓉開維當軒彌滉漾孤月正徘徊谷口

猿聲發風傳入戶來迪

南垞云輕舟南垞去北垞淼難卽隔浦望人家遙

遙不相識維孤舟信一泊南垞湖水岸落日下

崦嵫清波殊淼漫迪

歛湖云吹簫凌極浦日暮送夫君湖上一回首青

山卷白雲維空濶湖水廣青熒天色同艤舟一

長嘯四面來清風迪

柳浪云分行接綺樹倒影入清漪不學御溝上春

風傷別離維映池同一色逐吹散如絲結陰旣

得地何謝陶家詩迪

藥家瀨云颯颯秋雨中淺淺石榴瀉跳波自相濺

白鷺驚復下維瀨聲喧極浦沿涉向南津泛泛

鳧鷖渡時時欲近人迪

金屑泉云日飲金屑泉少當千餘歲翠鳳翊文螭
羽節朝玉帝維縈渟澹不流金碧如可拾迎晨

含素華獨往事朝汲迪

白石灘云清淺白石灘綠蒲尚堪把家住水東西

浣紗明月下維跂石復臨水弄波情未極日下

川上寒浮雲淡無色迪

北垞云北垞湖水北雜樹映朱欄逶迤南川水明

滅青林端維南山北垞下結宇臨歆湖每欲採

樵去扁舟出菰蒲迪

竹里館云獨坐幽篁裏彈琴復長嘯深林人不知

明月來相照維來過竹里館日與道相親出入

唯山鳥幽深無世人迪

辛夷塢云水末芙蓉花山中發紅萼澗戶寂無人

紛紛開且落維綠堤春草合王孫自留翫況有

辛夷花色與芙蓉亂迪

漆園云古人非傲吏自闕經世務偶寄一微官婆

娑數株樹維好閒早成性果此諧宿諾今日漆
園遊還同莊叟樂迪

椒園云桂樽迎帝子杜若贈佳人椒漿奠瑤席欲
下雲中君維丹刺習人衣芳香留過客幸堪調
鼎用願君垂採摘

李頎聖善閣送迪入京云雪花歛高閣苔色上鈎
欄藥草空階靜梧桐返照寒清吟可愈疾携手
暫同歡墜葉和金磬饑鳥鳴露盤伊川惜東別
灞水向西看舊託含香署雲霄何足難

崔興宗

興宗爲補闕時和王維勅賜櫻桃詩云未央朝謁
正逶迤天上櫻桃錫此時朱實初傳九華殿繁
花舊雜萬年枝全勝晏子江南橘莫比潘家大
谷梨聞道令人好顏色神農本草自應知

喜羣公訪林亭云窮巷深林常閉關悠然獨卧對
前山今朝忽枉嵇生駕倒屣開門遙解顏王維

詩云綠樹重陰蓋四隣青苔日厚自無塵科頭
箕踞長松下白眼看他世上人盧象云映竹時
聞轉轆轤當窗只見網蜘蛛主人非病常高臥
環堵蒙籠一老儒王縉云聲名不問十年餘老
大誰能更讀書林中獨酌隣家酒門外時聞長
者車裴迪云喬柯門裏自成陰散髮窗中曾不
簪逍遙且喜從吾事榮寵從來非我心
時號與宗爲處士

王維有崔九往南山馬上口號與別云城隅一分
首幾日還相見山中有桂花莫待花如霰裴迪
云歸山深淺去須盡丘壑美莫學武陵人暫遊
桃源裏與宗留別云駐馬欲分襟清寒御溝上
前山氣景佳獨往還惆悵

王維與興宗寫真詠云画君年少時如今君已老
今時新識人知君舊時好

王維送興宗遊蜀云送君從此去轉覺故人稀徒

御猶回首田園方掩扉出門當旅食中路授寒衣江漢風流地遊人何歲歸

唐詩紀事卷第十六

終

唐詩紀事卷第十七

賀知章

詠柳云碧玉粧成一樹高萬條垂下綠絲條不知細葉誰裁出二月春風似剪刀

曉發詩云故鄉杳無際江臯聞曙鐘始見沙上鳥

猶埋雲外峰

集載曉發詩云江臯聞曙鐘輕棧理還聊海潮夜約約川露晨溶溶

始見沙上鳥猶埋雲外峰故鄉杳無際明發懷朋從

以章年八十六臥病冥然無知疾員上表乞為道

士還鄉明皇許之捨宅爲觀賜名千秋命其男

曾子會稽郡司馬賜鑑湖剡川一曲

先乞官湖數頃爲放

生池因賜剡川一曲

詔令供帳東門百寮祖餞御製送詩

并序云天寶三年太子賓客賀知章鑿止足之分抗歸老之疏解組辭榮志期入道朕以其年在遲暮用循挂冠之事俾遂赤松之遊正月五日將歸會稽遂餞東路乃命六卿庶尹大夫供帳青門寵行邁也豈惟崇德尚齒抑亦勵俗勸

人無令二疏獨先漢冊乃賦詩贈行詩云遺榮

期入道辭老竟抽簪豈不惜賢達其如高尚心

寰中得秘要方外散幽襟獨有青門餞羣英悵

別深又云筵開百壺餞詔許二疎歸僊記題金

籀朝章拔羽衣悄然承睿藻行路滿光輝李林

甫詩云挂冠知止足豈獨漢疏賢入道求真侶

辭恩訪列僊睿文含日月宸翰動雲煙鶴駕吳

鄉遠遙遙南斗邊

孫蓮詩云稽山雲霧鬱嵯峨鏡水無風也自波莫
言春度芳菲盡別有中流採芰荷

朝士以知章吳越人戲云南金復生中土知章賦
詩云釵鏤銀盤盛蛤蜊鏡湖蓴菜亂如絲鄉曲
近來佳此味遮渠不道是吳兒

神龍中知章與越州賀朝萬齊融楊州張若虛邢
巨湖州包融俱以吳越文詞俊秀名聞上京朝
止山陰尉齊融崑山令若虛兗州兵曹巨監察

御史融遇張九齡引爲懷州司戶集賢直學士
知章最貴神龍中又有尉氏李澄之善五言詩
終宋州叅軍

送張說巡朔方應制云荒境盡懷忠梯航已自通
九攻雖不戰五月尚持戎遣戍徵周牒臨邊重
漢功選車命元宰授律取文雄胄出天弧上謀
成帝幄中詔旂分夏物專討錫唐弓帳宿伊川
右鉦吹晉苑東饗人藉蕢實樂正理絲桐岐陌

涵餘雨離川照晚虹恭聞詠方叔千載舞皇風
 送張說集賢上學士應制云西學垂玄覽東堂發
 聖謨天光燭武殿時宰集鴻都枯朽霑皇澤
 飛舞帝梧跡同遊汗漫榮是拔泥塗三歎承湯
 鼎千歡接舜壺微軀不可答空欲詠依蒲

賀蘭進明

古意云秦庭初指鹿羣盜滿山東忤意皆誅死所
 言誰肯忠武關猶未啓兵入望夷宮爲崇非涇

水人君道自窮又云崇蘭生澗底香氣滿幽林
 采采欲爲贈何人是同心日暮徒盈把徘徊憂
 思深慨然紉雜佩重奏丘中琴

祿山亂進明守臨淮以御史大夫爲節度使張巡
 睢陽之圍遣南霽雲乞師不應霽雲去抽矢回
 射佛寺浮圖曰吾殺賊必滅賀蘭此矢所以志
 也

山路難云君不見崑下井百尺不及泉君不見山

上苗數寸臨雲煙人生相命亦如此何苦太息
自憂煎但願親友長含笑相逢莫乏杖頭錢寒
夜邀歡須秉燭豈得容思花柳年又云君不見
門前柳榮耀暫時蕭條久君不見陌上花狂風
吹去落誰家誰家思婦見之歎蓬首不粧心歷
亂盛年夫婿長離別歲暮見之色凋換又云君
不見芳樹枝春花落盡蜂不窺君不見梁上泥
秋風始高鷲不棲蕩子從軍事征戰蛾眉嬋娟

守空閨獨宿自然堪下淚況復更聞烏夜啼又
云君不見雲間月慙盈復還缺君不見林下風
聲遠意難窮親故平生或聚散歡娛未盡樽中
空歎息青青陵上栢歲寒能與幾人同又云君
不見東流水水去無窮已君不見西郊雲日夕
空氣氳群雁徘徊不能去一雁驚鳴復失羣人
生結交在終始莫以升沈中路分

右行路難商
潘取於河岳

英靈集

進明登開元十六年進士第肅宗時進明為北海
太守詣行在上命房琯以進明為南海太守兼
御史大夫嶺南節度使琯以為攝御史大夫進
明入謝遂譖之上由是疎琯

李邕

李之芳自尚書郎出為齊州司馬製新亭邕有登
歷下古城員外孫新亭詩云吾宗固神秀體物
寫謀長形制開古跡曾冰延樂方太山雄地里

巨壑眇雲莊高興泊煩促永懷清典常含弘如
四大出入見三光負郭喜粳稻安時歌吉祥之

太宗子蔣王暉之後善五言詩初
為祿山范陽司馬祿山叛自拔歸

子美八哀詩有秘書監江夏李邕詩云長嘯宇宙
間高才日陵替古人不可見前輩復誰繼憶昔

李公存詞林有根抵

唐文苑傳李邕廣陵江都
人父善嘗注文選六十卷

行於時邕少知名長安初李嶠張
廷珪並薦邕詞高行直堪為諫諍

聲華當健筆

灑落富清製風流散金石追琢山岳銳

邕早擅
才名尤

長碑頌中朝衣冠天下寺觀多出其手情窮造化理學貫天人際

干謁走其門碑板照四裔各滿深望還森然起

凡例蕭蕭白楊路洞徹寶珠惠龍宮塔廟湧浩

劫浮雲衛宗儒俎豆事故吏去思計盼睽已皆

虛跋涉曾不泥向來映當時豈特勸後世豐屋

珊瑚鈎麒麟織成蜀紫騮隨劔几義取無虛歲

分宅脫驂間感激懷未濟衆歸賙給美擺落多

藏穢邕素負美名頻被貶斥皆以邕能文養士而賈生信陵之流執事忌勝剝落在外

獨步四十年風聽九臯唳邕知名長安中死天寶初四十年間可謂

獨步矣累獻詞賦甚得玄宗旨後因上計中使臨索其新文以文章徹天聽故有九臯唳之句

嗚呼江夏恣竟掩宣尼袂往者武后朝引用多

寵嬖否臧太常議邕有韋巨源謚議文士推重之面折二張勢

初邕為左拾遺俄而御史中丞宋璟奏侍臣張昌宗兄弟有不順之言請付法斷則天初不應

邕在陛下進曰璟言事關社稷望陛下可其奏則天色解始允宋璟既出或謂邕曰子名位尚

卑若不稱旨禍福將不測何為造衰俗凜生風次如是邕曰不顛不狂其名不章

排蕩秋旻霽忠正負冤恨宮闕深旒綴放逐早

聯翩低垂困炎癘

邕始以與張柬之善貶雷州玄宗初又貶後召還為姚崇

所嫉貶括州後為陳州玄宗東封回邕謁見於汴獻詞賦稱旨頗自矜銜為張說所惡發陳州

職事抵死許州人孔璋上疏救之會赦免貶欽州後於嶺南從中官楊思勗討賊有功轉括淄

滑三州刺史上計京師邕少有名累被貶逐後進不識京洛阡陌聚觀以為古人後傳眉目有

異衣冠望風尋訪門巷又中使臨問索其新文復為人陰中竟不得進用也

鳥入魂斷蒼梧帝榮枯走不暇星駕無安稅幾

分漢庭竹

漢制以竹使符分給郡守邕累為刺史故曰幾分

夙携文侯

篲終悲洛陽獄事近小臣敝禍階初負謫易力

何深濟

邕與柳勣馬一匹及勣下獄温令勣引邕議及休咎事遂誅

伊昔臨

淄亭酒酣託末契

甫有陪李北海宴歷下亭詩是也

重敘東都

別朝陰改軒砌論文到崔蘇

崔信明蘇明源二人以文章擅也

指盡流水逝近伏盈川雄

唐文苑傳楊炯為盈川令卒張說曰楊盈

川文思如懸河注酌之不竭既優於盧照隣亦不減王勃也

未甘特進麗

張說

曰李嶠之文如良金美玉無施不可特進李嶠為特進故也

是非張相國相

扼一危脆

玄宗東封回邕於汴州謁見累獻詞賦甚稱上旨由是頗自矜銜自云當

居相位又素輕張說與相惡說為中書令甚惡之

爭名豈古然鍵捷歛

不閉例及吾家詩曠懷掃氛翳慷慨嗣真作容

嗟玉山桂鍾律儼高懸鯤鯨噴迢遰坡陀青州

血蕪沒汶陽瘞邕葬所也哀贈竟蕭條恩波延揭厲

代宗時國恩例贈秘書監子孫在如綫舊客舟凝滯君臣尚

論兵將帥接燕薊朗詠六公篇邕有張桓等五公洎伏相六公

憂來豁蒙蔽盧藏用嘗謂邕如干將莫耶難與爭鋒但虞傷缺耳後卒如其言

邕字太和陽州人既冠見李嶠願一見秘書乃假

直秘閣累以罪譴開元末歷淄滑二州刺史上

計京師阡陌聚觀出為北郡太守李林甫忌之

天寶末以柳勣事遣御史就郡杖殺之先是邕

王弼王琚皆耆艾補外久書疏尺題有譴謫留

落之句林甫故陰議除之

陰行先

張燕公說至湘有九日登高詩云西楚茱萸節南

淮戲馬臺寧知洹水上復有菊花盃亭帳憑高

出親遊自遠來短歌將急景同使興情催

行先和云重陽初啓節無射正飛灰寂寞風蟬至
連翩霜雁來山棠紅葉下岸菊紫花開今日桓
公坐多愧孟嘉才

行先開元間爲湘州從事

李伯魚

桐竹詩贈張燕公云北竹青桐北南家綠竹南竹
林君早愛桐樹我初貪鳳棲桐不媿鳳食竹何
慙棲食更如此餘非鳳所堪

張燕公說和云結廬桐竹下室邇人相深接垣分
竹徑隔戶共桐陰落花朝滿岸明月夜披林竹
有龍鳴管桐留鳳舞琴

伯魚臨淄人登開元六年進士第善爲文擢授書
郎出爲青州司功而卒其妻范陽張氏女燕公
之妹也燕公銘張氏墓云送我伯妹萬安之墳
精靈何處爲雨爲雲彼臨淄兮千里望倏忽兮
夫君

趙冬曦

和張燕公說早霽南樓詩云方曙躋南樓凭軒四
 遐矚物華蕩暄氣春景媚晴旭川霽湘山孤林
 芳楚郊縹列巖重疊翠遠岸逶迤綠風帆摩天
 垠漁艇散灣曲鴻歸鶴舞遠猿叫鶯斷續羣動
 皆熙熙噫予獨羈束常欽才子義忌鵬傷蹉跎
 雅尚騷人文懷沙何迫促未知二賢意去矣從
 所欲

和張說耗磨日飲云春來半月度俗忌一朝閑不

酌他鄉酒無堪對楚山

攷別刻載此題詩云上
月今朝減流傳耗磨辰

還將不事事
同醉俗中人

冬曦定州人開元初為監察御史坐事流岳州召

還復官

酬燕公見歸田賦垂贈之作云窮鳥嬰籠綴孤飛
 任播遷鷦鷯王佐用復此挫冲天楚雲何掩鬱
 湘水亦迴遘懷哉愧木雁忽爾枉蘭荃愈疾同

枚叔銷憂比仲宣歸途書可畏弱操石猶堅覆
載雖云廣泮陽直塊然

澠湖作云三湖返入兩山間畜作澠湖變復變暑
雨奔流湘正滿微霜及潦水初還水還波卷溪
潭涸綠草芊芊岸蘄岸適方飛掉共迴旋已復
揚鞭恣行樂道傍耆老步躑躑楚言茲事不知
年試就湖邊披草徑莫疑東海變桑田君訝今
時盡陵陸我看明歲更淪漣來今去昔無終始

人事迴環常若是應思闕下聲華日誰謂江潭
旅遊子初貞正喜適當然往蹇來譽宜可俟盈

虛用捨輪輿旋勿學靈均遠問天

序云巴江南澠湖者蓋沅

湘汨之餘波淪匯洞庭澹澹千里夏潦成湖秋冬涸為野爾雅云水返入為澠斯名之作有由

爾焉

和燕公岳州山城云為吏恩猶舊投沙惠此蒙江
邊悠爾處泗上宛然同訪道精言合論經大義
通鳴琴有真氣況已沐清風

陪燕公行郡竹籬云良臣乃國寶麾守去承明外
戶人無閉浮江獸已行隨來晉盜逸民化蜀風
清郭郭從彝典州閩荷德聲小人被天渥流落
巴丘城所賴中和作優游鑿與耕

酬燕公出湖見寄云綸紱有成命旌麾不可攀湘
川朝日斷荆闕夕波還果枉東瞻唱興言夕放
間攜琴仙洞中置酒滄湖上芳景恣行樂謫居
忽如忘聚散本相因離情自悲悵鸞翮非常戢

鵬天會昭曠永懷宛洛游曾是彈冠望

和燕公遊滄湖上寺云江外多山水招要步馬來
琴將天籟合酒共鳥聲催巖坐攀紅藥溪行愛
綠苔所懷非此地遊望亦徘徊

和燕公別滄湖云南湖美泉石君子翫幽奇灣澳
陪臨泛巖嵒共踐窺秋風頽桂竦春景綠楊垂
郢路委分竹湘濱擁去麾枉帆懷勝賞留景惜
差池水木且不棄情遊良可知

尹忭

陪燕公登南樓詩云君子每垂眷江山共流盼水
 遠林外明崑近霧中見終日西北望何處是京
 縣屢登高春臺徒使淚如霰燕公和云危樓寫
 明洞積水照城隅命駕邀漁父通家引鳳雛山
 晴紅藥匝洲曉綠苗鋪舉目思鄉縣春光定不
 殊

趙冬曦云寬慰何以歡陰氣亦登望孤島輕霧裏
 行舟白波上目勞西北雲心醉東南障昔日青
 溪子胡然此惆悵

秋夜遊滄湖詩云熊軾巴陵地鷁舟湘水潯江山
 與勢遠泉石自幽深杳靄入天壑冥茫見道心
 超然無俗事清宴有空林又云江上饒奇山噴
 羅雲水間風和樹色雜苔古石文斑巴俗將千
 澆滄湖凡幾灣嬉遊竟不盡乘月泛舟還

忭序云燕公以司馬初到趙侍御客焉聿理方舟嬉遊滄壑覽山川之異探泉石之奇騁望崇朝留樽待

月一時之樂
豈不盛歟

燕公和云滄湖佳可遊既近復能

幽林裏棲精舍山間轉去舟雁飛江月冷猿嘯
野風秋不是迷鄉客尋奇更泝流又云坐嘯人
事閒佳遊野情發山門送落照湖口望升月林
尋猿狖居水戲龜鼉穴朔風吹飛雁芳草亦云
歇

趙冬曦云政理常多暇方舟此泝洄吹笙虛洞答
舉楫便風催山暗雲猶辨潭幽月稍來清溪無

數曲未盡莫先回又云煙靄夕微蒙幽灣賞未
窮艤舟待初月褰幌招遠風鶴聲聒前浦漁火
明暗叢東山雲壑意不謂爾來同

張均云遠水沉西日寒沙聚夜鷗平湖乘月滿飛
棹接星流黃葉鳴淒吹蒼葭掃暗洲願移滄浦
賞歸侍潁川遊又云灣潭幽意深杳靄涌寒岑
石痕秋水落嵐聚夕陽沉澄澈天爲底淵玄月
作心清溪非大隱歸棄白雲溇

沉洞庭云風光浙浙草中飄日采熒熒水上搖幸
 奉瀟湘雲壑意山傷容與動仙槁燕公和云平
 湖一望水連天秋景千尋下洞泉忽驚水上光
 華滿疑是乘舟到日邊

忝開元時張燕公岳州從事官補闕

崔成甫 李白詩崔侍御是也

贈李白云我是瀟湘放逐臣君辭明主漢江濱天
 外常求太白老金陵捉得酒仙人白和二嚴陵

不從萬乘遊歸卧空山釣碧流自是客星辭帝
 座元非太白醉揚州

李白澤畔吟序云澤畔吟者逐臣崔公所作云代
 業文宗早茂才秀起家校書蓬山再尉關輔中
 佐于憲軍因貶湘陰流離沅湘摧頽草莽忠憤
 義烈形於清辭其怨者之流乎

開元末長安令韋堅兼水陸轉運使鑿潭望春樓
 下先是民間唱俚歌曰得體紇那邪其後得寶

符於桃林時成甫為陝縣尉變得體歌為得寶
 弘農韋堅命舟人歌之成甫又廣之為歌辭十
 闕自衣缺後綠衣錦半臂紅抹額立第一船為
 號頭以唱集兩縣婦女百人鮮服靚粧鳴鼓吹
 笛以和之

先是人間戲唱歌詞云得

丁紇 體都董

反 紇那紇

囊得體邪潭裏船車鬧揚州銅器多三郎當殿
 坐看唱得體歌至開元二十九年田同秀上言

見玄元皇帝云有寶符在陝州桃林縣古關令
 尹喜宅發中使求而得之以為殊祥改桃林為
 靈寶縣以韋堅為陝郡太守鑿新潭潭成又致
 揚州銅器翻出此詞廣集兩縣官使婦人唱之
 言得寶弘農野弘農得寶邪潭裏船車鬧揚州
 銅器多三郎當殿坐看唱得寶歌成甫又作歌
 詞十首

李昂

雋秀等科初皆考功主之開元二十四年李昂員外性剛急不容物以舉人皆飾名求稱搖蕩主司談毀士類實竊病之而將革焉集貢士與之約曰文之美惡悉知之矣考校取捨存乎至公如有請託於時求聲於人者當首落之既而昂外舅常與進士李權隣居相善乃舉權於昂昂怒集貢人召權庭數之權謝曰人或相知竊聞於左右非敢求也昂因曰觀衆君子之文信美

矣然古人云瑜不掩瑕忠也其有詞或不典將與衆評之若何皆曰唯公之命既出權謂衆曰向之言其意屬吾也吾誠不第決矣又何藉焉乃陰求昂瑕以待之異日會論果斥權章句之疵以辱之權拱而前曰夫禮尚往來來而不往非禮也鄙文不滅既得闢命矣而執事者有雅什嘗聞於道路愚將切磋可乎昂怒而嬉笑曰有何不可權曰耳臨清渭洗心向白雲閑豈執

事之詞乎昂曰然權曰昔唐堯衰老倦天下
將禪于許由由惡聞故洗耳今天子春秋鼎盛
不揖讓於足下而洗耳何哉是時國家寧謐百
寮畏法令兢兢莫敢蹉跌昂聞惶駭蹶起不知
所酌乃訴於執政謂權風狂不遜遂下權吏初
昂強愎不受囑請及有吏議求者莫不允從由
是廷議以省郎位輕不足以臨多士乃以禮部
侍郎專之

昂賦戚夫人楚舞歌云定陶城中是妾家妾年二
八顏如花閨中歌舞未終曲天下死人如亂麻
漢王此地因征戰未出簾櫳人已薦風花菡萏
落轅門雲雨徘徊入行殿日夕悠悠非舊鄉飄
飄處處逐君王閨門向裏通歸夢銀燭迎來在
戰場相從顧恩不顧己何異浮萍寄深水逐戰
曾迷隻輪下隨君幾陷重圍裏此時平楚復平
齊咸陽宮闕到關西珠簾夕殿聞鐘磬白日秋

天憶鼓鼙君王縱恣翻成誤呂后由來有深妬
不奈君王容鬢衰相存相顧能幾時黃泉白骨
不可報雀釵翠羽從此辭君楚歌兮妾楚舞脉
脉相看兩心苦曲未終兮袂更揚君流涕兮妾
斷腸已見儲君歸惠帝徒留愛子付周昌

殷遙

題友人亭云故人雖薄宦往往涉清溪鑿牖對山
月褰裳拂澗霓游魚逆水上宿鳥向風棲一見

桃花發能令秦漢迷

山行云寂歷青山曉山行趣不稀野花成子落江
燕引雛飛暗草薰苔徑晴楊拂石磯俗人猶此
語余亦轉忘歸

王維哭遙云人生能幾何畢竟歸無形念君等爲
死萬事傷人情慈母未及葬一女纔十齡泱泱
寒郊外蕭條聞哭聲浮雲爲蒼茫飛鳥不能鳴
行人同寂寞白日自淒清憶昔君在時問我學

唐詩紀事 二十一
無生勸君苦不早令君無所成故人各有贈又
不及生平負爾非一途慟哭返柴荆

送殷四葬云送君反葬石樓山松柏蒼蒼賓馭還
埋骨白雲長已矣空餘流水向人間

遙丹陽人又云句容人天寶間終於忠王府曹叅
軍

余延壽

人日剪綵詩云閨婦持刀坐自憐裁剪新葉催情

綴色花寄手成春帖鸞畱妝戶黏鷄待餉人驚
來問夫壻何處不如真

延壽開元間江寧人處士也

苑咸

王維贈咸詩序曰苑舍人能書梵字兼達梵音曲
盡其妙戲爲之贈詩云名儒待詔滿公車才子
爲郎典石渠蓮華法藏心懸悟貝葉經文手自
書楚詞共許勝楊馬梵字何人辨魯魚故舊相

望在三事願君莫厭承明廬咸答詩蓮華梵字
本從天華省仙郎早悟禪三點成伊猶有想一

觀如幻自忘筌為文已變當時體入用還吹間

氣賢應同羅漢無名欲故作馮唐老歲年

王為庫部

員外郎久不遷故咸未句及之王答云
仙郎真意憐同舍丞相無私斷掃門

咸成都人開元末上書拜司經校書中書舍人顏

真卿序孫逖文集曰公之除庶子也死咸草詔

曰西掖掌綸朝推無對議者以為知言唐人推

咸為文誥之最後貶漢東郡司戶叅軍復起為

舍人終永陽太守始咸舉進士在京仲夏忽染

疾而卒三日復蘇云見人追至陰司見劉敬則

為冥官乃同舉進士也問其故乃曰追城乃誤

召公遣追押還咸曰數上京不捷家遠且貧試

閱籍若有科第官職即願生還劉謂曰君來春

登第歷臺省至中書舍人

丘為

唐詩紀事 卷十七
爲蘇州嘉興人事繼母孝常有靈芝生堂下累官
太子右庶子時年八十餘而母無恙給俸祿之
半及居憂觀察使韓滉以致仕官給祿所以惠
養老臣不可在喪而異惟罷春秋羊酒初還鄉
縣令謁之爲候門磬折令坐乃拜里胥立庭下
旣出乃敢坐經縣宅降馬而趨卒年九十六與
劉長卿善長卿送爲赴上都詩云帝鄉何處是
岐路空垂泣楚思愁暮多川程帶潮急潮歸人
不歸獨向回塘立王摩詰送爲往唐州詩云四
愁連漢水百口寄隨人

爲尋西山隱者不遇詩云絕頂一茅茨直上三十
里扣關無僮僕窺室唯案几若非巾柴車應是
釣秋水差池不相見黽俛空仰止草色新雨中
松聲晚秋裏及茲契幽絕自足盪心耳雖無賓
主意頗得清淨理興盡方下山何必待之子
摩詰賦左掖梨花詩云閑灑階邊草輕隨箔外風

黃鸞弄不足銜入未央宮爲和云冷艷全欺雪
餘香乍入衣春風且莫定吹向玉階飛皇甫冉
詩云巧解迎人笑偏能亂蝶飛春風時入戶幾
片落朝衣

唐詩紀事卷第十七

終

唐詩紀事卷第十八

杜甫

元稹作子美墓銘叙曰余讀詩至杜子美而知古
人之才有所總萃焉始堯舜之君臣以賡歌相
和是後詩人繼作歷夏殷周千餘年仲尼緝拾
選練取其干預教化之尤者三百篇其餘無聞
焉騷人作而怨憤之態繁然猶去風雅日近尚
相比擬秦漢已還采詩之官旣廢天下俗謠民

唐詩紀事 一
謳歌頌諷賦曲度嬉戲之詞亦隨時間作至漢
武賦栢梁詩而七言之體興蘇子卿李少卿之
徒尤工爲五言雖句讀文律各異雅鄭之音亦
雜而詞意濶遠指事言情自非有爲而爲則文
不妄作建安之後天下文士遭罹兵戰曹氏父
子鞍馬間爲文往往橫槊賦詩故其道文壯節
抑揚怨哀悲離之作尤極於古晉世風槩稍存
宋齊之間教失根本士子以簡慢矯飾舒徐相

尚文章以風容色澤放曠精清爲高蓋吟寫性
靈流連光景之文也意義格力固無取焉陵遲
至梁陳淫艷刻飾佻巧小碎之詞劇又宋齊之
所不取唐興學官大振歷世之文能者互出而
又沈宋之流研鍊精切穩順聲勢謂之爲律詩
由是而後文變之體極焉然而好古者遺近務
華者去實效齊梁則不逮於晉魏工樂府則力
屈於五言律切則骨格不存閑暇則纖穠莫備

至於子美蓋所謂上薄風雅下該沈宋言奪蘇
李氣吞曹劉掩顏謝之孤高雜徐庾之流麗盡
得古今之體勢而兼昔人之所獨專矣如使仲
尼考鍛其旨要尚不知貴其多乎哉苟以爲能
所不能無可無不可則詩人以來未有如子美
者是時山東人李白亦以奇文取稱時人謂之
李杜余觀其壯浪縱恣擺去拘束摸寫物象及
樂府歌詩誠亦差肩於子美矣至若鋪陳終始

排比聲韻大或千言次猶數百詞氣豪邁而風
調清深屬對律切而脫棄凡近則李尚不能歷
其藩翰況堂奧乎余嘗欲條析其文體別相附
與來者爲之準特病懶未就爾適遇子美之孫
嗣業啓子美之柩襄祔事於偃師途次于荆楚
雅知余愛言其大父之爲文祈余爲誌辭不可
絕余因系其官闕而銘其卒葬云系曰晉當陽
成侯姓杜氏下十世而生依藝令於鞏依藝生

審言善詩官至膳部員外郎審言生閑閑生甫
閑爲奉天令甫字子美天寶中獻三大禮賦明
皇奇之命宰相試文文善授右衛率府胄曹屬
京師亂步謁行在授左拾遺歲餘以直言失官
出爲華州司功尋遷京兆功曹劔南節度使嚴
武狀爲工部員外參謀軍事旋又棄其官扁舟
下荆楚間竟以寓卒旅殯岳陽享年五十有九
夫人弘農楊氏女父曰司農少卿怡四十九年

而終嗣子曰宗武病不克葬歿命其子嗣業以
家貧無以給喪收拾乞匄焦勞晝夜去子美歿
後餘四十年然後卒先人之志亦足爲難矣銘
曰惟元和之癸巳粵某月某日之佳辰合窆我
杜子美於首陽之山前嗚呼千歲而下曰此文
先生之古墳

樂天曰杜詩最多至於貫穿今古覩縷格律盡工
盡善又過於李然撮其新安石濠潼關吏蘆子

關花門之章朱門酒肉臭路有凍死骨之句亦
不過三四十杜尚如此況不達者乎

睿宗先天元年癸丑壬子是歲甫生明皇開元三年丙

辰於郾城觀公孫大娘舞劍器是年纔四歲天

寶元年癸未壬午有南曹小司寇為山之作時年三

十一天寶十一年癸巳壬辰上韋相詩有龍飛四十

春帝即位四十年時有兵車行麗人行十三年

乙未甲午上三大禮賦甫年四十三召試文章授河西尉不行改右

衛率府十四年丙申乙未是年十一月初自京赴奉

先有詠懷詩是月祿山亂以家避亂鄜州獨陷賊中天寶十

五載丁酉丙申六月帝西狩有哀王孫詩七月肅宗

即位改元至德是年避寇馮翊有白水高齋三

州觀漲詩至德二年自賊中竄歸鳳翔拜左拾

遺八月墨制放往鄜州迎家有北征詩明年乾

元元年收京扈從還長安上疏論救房瑄帝怒

黜甫華州司功有新安吏石壕吏新婚別垂老

別畱花門洗兵馬詩明年關輔饑亂棄官之秦

州乃適同谷乃入蜀有遣興三百首上元元年

庚子

辛丑在蜀二年嚴武鎮蜀甫自閬往依焉明年

壬寅

寶應元年癸卯有元年建巳月詩代宗廣德元

癸卯

年甲辰有祭房相國文武再鎮蜀表甫叅謀檢

乙巳

校工部員外作傷命五首永泰元年丙午武卒

崔旰殺郭英又楊子珠栢正節舉兵攻旰蜀亂

丙午

甫遊東川除京兆功曹不赴大曆元年丁未移

居夔州三年出峽之荆渚至湘潭寓居耒陽五

庚戌

年辛亥有追高適人日作夏甫還襄漢卒于岳

陽每歲干支與唐書年譜不同附存于旁

段成式酉陽雜俎云李白集有堯祠亭上宴別杜

補闕者老杜也今錄首尾曰我覺秋興逸誰言

秋興悲山將落日去水與晴空宜烟歸碧海夕

雁度青天時相失各萬里茫然空爾思不獨飯

顙山頭之句也

國朝盛文肅嘗夢朝上帝見殿上題扇云夜闌更秉燭相對如夢寐初謂天上人作已而知子美詩也

禰衡槌漁陽搯其聲悲壯漢武時星辰影動搖東方朔謂民勞之應子美詩云五更鼓角聲悲壯三峽星河影動搖乃用故事也先儒云不行一萬里不讀萬卷書不知杜詩信然

詩話云有病瘡者子美曰吾詩可以療之病者曰云何曰夜闌更秉燭相對如夢寐其人誦之瘡猶是也杜曰更誦吾詩云子璋髑髏血模糊手提擲還崔大夫其人誦之果愈子美傲誕不冠見嚴武故詩云莫倚善題鸚鵡賦何須不着鷄冠子美奉酬云謝安不倦登臨興阮籍焉知禮法疎傳敘子美傲放武積不平欲殺之冠鈎於簾者三遂止

寄韋有夏都中詩云省郎憂病士書信有柴胡飲

子頻通汗懷君想報珠飲子對懷君或云沈佺期齒錄對牙緋孟浩然鷄黍對楊梅之類也

子美題李尊師松障詩云已知僊客意相親更覺良工心獨苦用意之妙有舉世莫知者此唐人所以名家也

李白

烏棲曲云姑蘇臺上烏棲時吳王宮裏醉西施吳歌楚舞歡未畢青山猶銜半邊日銀箭金壺漏

水多起看秋月墜江波東方漸高奈樂何天寶初賀知章見之曰此詩可以泣鬼神矣

蜀道難云噫吁噓危乎高哉蜀道之難難於上青天蚕叢及魚鳧開國何茫然爾來四萬八千歲乃與秦塞通人煙西當太白有鳥道可以橫絕峨眉巔地崩山摧壯士死然後天梯石棧相鈎連上有六龍迴日之高標下有衝波逆折之迴川黃鶴之飛尚不得猿猱欲度愁攀緣青泥何

唐詩紀事 卷十八
盤盤百步九折縈崑巒捫參歷井仰脇息以手
撫膺坐長歎問君西遊何時還畏途巉崑不可
攀但見悲鳥號古木雄飛雌從繞林間又聞子
規啼夜月愁空山蜀道之難難於上青天使人
聽此凋朱顏連峰去天不盈尺枯松倒掛倚絕
壁飛湍瀑流爭喧豗水崖轉石萬壑雷其嶮也
若此嗟爾遠道之人胡爲乎來哉劔閣崢嶸而
崔嵬一夫當關萬夫莫開所守或匪親化爲狼

與豺朝避猛虎夕避長蛇磨牙吮血殺人如麻
錦城雖云樂不如早還家蜀道之難難於上青
天側身西望長咨嗟蜀道難或曰譏章仇兼瓊
或曰譏嚴武之暴爲房相杜甫危之也

宮中行樂詞云小小生金屋盈盈在紫微山花插
寶髻石竹繡羅衣每上深宮裏常隨步輦歸只
愁歌舞散化作彩雲飛又云柳色黃金嫩梨花
白雪香玉樓巢翡翠珠殿鎖鴛鴦選妓隨雕輦

唐詩集卷九十八
九十八
徵歌出洞房宮中誰第一飛鸞在昭陽又云盧
橘爲秦樹蒲桃出漢宮煙花宜落日絲管醉春
風笛奏龍鳴水簫吟鳳下空君王多樂事何必
向回中又云玉樹春歸日金宮樂事多後庭朝
未入輕輦夜相過笑出花間語嬌來燭下歌莫
教明月去畱著醉姮娥又云繡戶香風暖紗窻
曙色新宮花爭笑日池草暗生春綠樹聞歌鳥
青樓見舞人昭陽桃李月羅綺自相親又云今

日明光裏還須結伴遊春風開紫殿天樂下朱
樓豔舞全知巧嬌歌半欲羞更憐花月夜宮女
笑藏鈎又云寒雪梅中盡春風柳上歸宮鶯嬌
欲醉簷燕語還飛遲日明歌席新花豔舞衣晚
來移綵仗行樂好光輝又云水綠南薰殿花紅
北闕樓鶯歌聞太液鳳吹遶瀛洲素女鳴珠珮
天人弄綵毬今朝風日好宜入未央遊明皇坐
沉香亭意有所感欲得白爲樂章召入而白已

唐詩紀事 卷十八
醉左右以水頰面稍解授筆成文宛麗精切無
留思

清平調詞云雲想衣裳花想容春風拂檻露華濃
若非羣玉山頭見會向瑤臺月下逢又云一枝
紅豔露凝香雲雨巫山枉斷腸借問漢宮誰得
似可憐飛燕倚新妝又云名花傾國兩相歡長
得君王帶笑看解釋春風無限恨沉香亭北倚
闌干禁中木芍藥開上賞之妃子從帝曰賞名

花對妃子焉用舊樂詞爲命李龜年持金花牋
賜白爲清平樂詞三章梨園子弟撫絲竹李龜
年歌之上親調玉笛以倚曲每曲遍將換則遲
其聲以媚之太真以頗梨七寶杯酌西涼蒲萄
酒笑飲

翰林讀書言懷呈集賢院內諸學士云晨趨紫禁
中夕待金門詔觀書散遺帙探古窮至妙片言
苟會心掩卷忽而笑青蠅易相點白雪難同調

本是散疎人屢貽福促誚雲天屬清朗林壑憶
遊眺或是清風來閑倚欄下嘯巖光桐廬溪謝
客臨海嶠功成謝人君從此一投釣

高力士以脫靴之耻譖白於貴妃曰以飛燕指妃
子是賤之甚也不爲親近所容乃益放鶯爲酒
八僊人懇求還山

潯陽紫極宮感秋作云何處聞秋聲條條北窻竹
迴薄萬古心攬之不足掬靜坐觀衆妙浩然媚

幽獨白雲南山來就我簷下宿嬾從唐生決羞
訪季主卜四十九年非一往不可復野情轉蕭
散世道有翻覆陶令歸去來田家酒應熟是時
自有歸山之意矣

胡無人云巖風吹霜海草凋筋籛精堅胡馬驕漢
家戰士三十萬將軍兼領霍嫖姚流星白羽腰
間插劔花秋蓮光出匣天兵照雪下玉關虜箭
如沙射金甲雲龍風虎盡交迴太白入月敵可

唐詩紀事 卷十八
摧敵可摧旄頭滅履胡之腸涉胡血懸胡青天
上埋胡紫塞旁胡無人漢道昌陛下之壽三千
霜但歌大風雲飛揚安用猛士兮守四方此詩
祿山反時作祿山死太白食月云

東武吟云好古笑流俗素聞賢達風方希佐明主
長揖辭成功白日在高天回光燭微躬恭承鳳
鳳詔歛起雲蘿中清切紫霄迴優游丹禁通君
王賜顏色聲價凌煙虹乘輿擁翠蓋扈從金城

東寶馬麗絕景錦衣入新豐倚巖望松雪對酒
鳴絲桐因學楊子雲獻賦甘泉宮天書美片善
清芬播無窮歸來向咸陽談笑皆王公一朝去
金馬飄落成飛蓬賓友日疎散玉樽日成空才
力猶可倚不慙世上雄閑作東武吟曲盡情未
終書此謝知己吾尋黃綺翁或曰白以是詩畱
別翰苑遂放遊江湖矣

對酒憶賀監序云太子賓客賀公於長安紫極宮

唐詩紀事 十三
一見呼余爲謫仙人因解金龜換酒爲樂沒後
對酒悵然有懷而作是詩曰四明有狂客風流
賀季真長安一相見呼我謫仙人昔好盃中物
翻爲松下塵金龜換酒處却憶淚沾巾又狂客
歸四明山陰道士迎勅賜鏡湖水爲君臺沼榮
人亡餘湖宅空有荷花生念此杳如夢凄然傷
我情又曰欲向江東去定將誰舉杯稽山無賀
老却棹酒船迴

飯顙山頭逢杜甫頂戴笠子日卓午借問因何太
瘦生總爲從前作詩苦此詩載於唐舊史

近世傳白詩云斷崖如削爪嵐光破崖綠天河從
中來白雲漲川谷玉案勅文字世眼不可讀攝
身凌青雲松風拂我足又云舉袖露條脫招我
飯胡麻

白本末傳記所載不同唐史稱白與聖皇帝九世
孫隋末以罪徙西域神龍初遁還客巴西旣長

隱岷山蘇頲爲益州長史見白異之更客任城
與孔巢父韓準裴政張叔明陶沔居徂徠山日
沉飲號竹溪六逸天寶初南入會稽與吳筠善
筠被召故白亦至長安往見賀知章賀知章見
其文歎曰子謫仙人也

嚴武傳武爲劔南節度使房琯以故相爲部內刺
史武慢倨不爲禮最厚杜甫然欲殺甫數矣李
白爲蜀道難者乃爲房杜危之也韋臯傳天寶

時李白爲蜀道難斥嚴武陸暢更爲蜀道易以
美韋臯摭言云太白自蜀至京以新業贄謁賀
知章知章覽蜀道難一篇揚眉謂之曰公非人
世人豈非太白星精耶然則蜀道難之作久矣
非爲房杜也

又南部新書云李白山東人父爲任城尉因家焉
少與魯人隱徂徠山號竹溪六逸天寶初遊會
稽吳筠隱剡中谷稱蜀人非也今任城令廳有

白之詞尚存唐范傳正誌其墓曰白涼武昭王
九世孫昭王隴西人隋末子孫以罪徙西域神
龍時白父客自西域逃居綿之巴西而白生焉
唐魏顥李陽冰序其文劉全白撰其墓碣皆曰
廣漢人故論白者或曰隴西或曰山東或曰蜀
陽冰云李翰林浪跡縱酒以自昏穢詠歌之際
屢稱山東李白亦云以張垞讒逐遊海岱間子
美所謂汝與山東李白好蓋白自號也蜀道難

或曰作於天寶或曰作於天寶末二說皆出於
後世以意逆之曰此爲房杜危之也陸暢去白
未遠作蜀道易以美韋臯傳之當時而蜀道難
之詞曰錦城雖云樂不如早還家其意必有所
屬房杜之說蓋近之矣

白之父客於巴
西故以客呼之

東蜀楊天惠彰明逸事云元符二年春正月天惠
補令於此竊從學士大夫求問逸事問唐李太
白本邑人微時募縣小吏入令臥內嘗驅牛經

堂下令妻怒將加詰責太白亟以詩謝云素面
倚欄鈎嬌聲出外頭若非是織女何必問牽牛
令驚異不問稍親招引侍研席令一日賦山火
詩思乾不屬太白從旁綴其下句令詩云野火
燒山去人歸火不歸太白繼云焰隨紅日遠煙
逐暮雲飛令慙止頃之從令觀漲有女子溺死
江上令復苦吟太白輒應聲繼之令詩云二八
誰家女漂來倚岸蘆鳥窺眉上翠魚弄口旁珠

太白繼云綠髮隨波散紅顏逐浪無何因逢五
伯應是想秋胡令滋不悅太白恐棄去隱居戴
天大匡山往來旁郡依潼江趙徵君蕤亦節士
任俠有氣善爲縱橫學著書號長短經太白從
學歲餘去遊成都賦春感詩云茫茫南與北道
直事難諧榆莢錢生樹楊花玉糝街塵縈遊子
面蝶弄美人釵却憶青山上雲門掩竹齋益州
刺史蘇頲見而奇之時太白齒方少英氣溢發

諸爲詩文甚多微類宮中行樂詞體今邑人所
藏百篇大抵皆格律也雖頗體弱然短羽雛褊
已有雛鳳態淳化中縣令楊遂爲之引謂爲少
作是也遂江南人自名能詩累謫爲令云始太
白與杜甫相遇梁宋間結交歡甚久乃去客居
魯徂徠山甫從嚴武成都太白益流落不能歸
故甫詩又云匡山讀書處頭白好歸來然學者
多疑太白爲山東人又以匡山爲匡廬皆非也

今大匡山猶有讀書臺而清廉鄉故居遺地尚

在廢爲寺名隴西院有唐梓州刺史碑

失其名及

綿州刺史高祝記太白有子曰伯禽女平陽皆
生太白去蜀後有妹月圓前嫁邑子畱不去以
故塋邑下墓今在隴西院旁百步外或傳院乃
其所捨云

白詩云昔作芙蓉花今爲斷腸草以色事他人能
得幾時好陶弘景僊方云斷腸草不可食其名

美好名芙蓉乃知詩人無一字閑話

唐詩紀事卷第十八卷





